



東萊先生詩集卷第十一

呂本中居仁

食筍

窮鄉未寂寥五月富筍茁近山新得雨此物晚亦發
初看數寸出意有千尺拔長條不成鞭乃以美見伐
錦綉罷駢頭玉指已不韞坐令藜藿口如受滌瀝滑
連年江海病未免魚蟹罰甘津到齒頰恐此或未察
居閑快一飽我已久斷殺更莫厭比鄰時時聽羹戛

白鬚

不作韓城住虛為河朔行白鬚鑷更出知為阿誰生
宿劉固寺佛殿下即劉伶墳也

劉伶墳上土佛殿古崔巍坐久野僧出天寒飢雁來
千年醉裏魄一甗死前灰未盡先生意空留數字回
懷衛道中寄京師諸友三首

客舍冷如漿客夢甘如飴初無遠行念况有徂年悲
平生好交游大半走路歧不如亭前月所到長相隨
何時脫身去共採西山芝有兒當似公尚能傳我詩

其二

直莫如兩王清莫如兩方孫謝豈不羨久滯尚書郎
黎子老歸國只今鬚髻蒼邵子住山雲欲出未肯忙
高子出林壑坐看天際翔

其三

人誰不小康李趙常窘束窮閭鬻温火老未飽饘粥
它長未遽數此事已絕俗為人死不厭自奉一來足

河堤

平田接長河眼界起突兀今日並堤行麥壠青已出
客行不知晚但感此節物新霜被西山久厭塵土没
坐懷故人面於此見鬢鬢

寄濬州張揆

張卿留客酒如澠我欲從之病不能憶過公家更東
望斷崖高樹雪層：

東坡先生詩集
田家樂

東家西家蠶上簇南村北村麥白熟小兒腰鎌日早
歸大兒去就田間宿斗酒相邀不為薄隣翁相對且
斟酌聖主當陽億萬年年：歲：田家樂

梅

獨自不爭春都無一點塵忍將冰雪面所至媚遊人

寄崔德符

江城昔還往耆舊各能文暫別猶相憶雖忙亦見存
好詩能愈疾濁酒不勝渾它日經行地相尋夜叩門

還家

解鞍馭馬倦西遊過眼文書且罷休薄酒向人殊有
味長年於世已無求常情未語溝中木俗眼能驚海
上鷗何處雲山不堪隱更誰辛苦訪菟裘

即事

晚菘早韭老不厭夜鯉晨鳧多見踈地僻難尋野僧
飯路長時枉故人車青山出沒塵埃裏白髮栽培疾
病餘更有腐儒窮事業夜窓殘燭一編書

讀易

春溫瘡疥繁衣敝蟣虱細類然坐南軒讀易初有味
初看象數殊忽此又象異紛：耆衆說行各半途滯

大言累千百雜說記一二坐令天人分復以小大計
或強出枝葉或自起旒贅孰能言語表能使意獨至
空中本無華眼病因有翳沈思忽有得是則入精義
吾生晚聞道歲月令少憇遺經日在眼似足了一世
臨流濯垢衣尚勿惜餘棄

復往大名

復往真無策茲行亦漫遊塵埃走劇暑風雨占新秋
便欲還家去其誰為汝謀尚憐蘇季子虛敝黑貂裘

其二

我老不自得每為飢所毆漫拋青蒻笠空負白髭鬚

見賊猶堪鬪逢人莫問途囊區足秀句山澤有臞儒

其三

地濕頻經水田荒亦未收斷雲催雨過漲水沒橋流
半世想高卧十年悲遠遊藜羹不用扶尚足誑饑喉

開德道中

五更發荒村小憇草市北披衣渡積水月落天正黑
豆苗半委地野父厭圃畝我馬則已飢泥土污羈勒
翻思在家時一飯亦假資小兒不解事笑詩頗自得
一官走道路此責久未塞速行勿遲留有手須擊賊

陽翟道中

不為傷離別其如漸老何祇應從此去轉覺白鬚多
長葛道中遇周原仲

羸馬衝寒驕不駛積雪殘冰雜泥滓長葛縣中日落
時舉頭忽見周夫子下馬相看兩驚怪各喜南歸此
身在僧房夜語久不眠更摩枵腹償詩債予行四方
尚謀食我亦年來倦行役櫪下驂驩世得知海底珊
瑚人未識長安公知富貴客誰能日在子思側洛陽
少年未宜輕看子重陳治安策

簡叔易益謙兄弟

秋來歸興復何如李范穀名更羨渠宅日買田我有
策兩家兄弟要鄰居

贈益謙兄弟

范即走微官清固不絕俗家常四壁立腹有萬卷讀
尔來所為文深若泉萬斛紆餘風過水宛轉蟲蛇木
諸弟况可人不但好眉目丹穴固出鳳藍田自宜玉
行扛九鼎重煩使一世伏聖朝急用士如子尚窮獨
乃知德在躬不必富潤屋我病拙文詞筆鈍如髮禿
時逢子弟兄未諸心已足長空絕纖埃何處着鳧鷖
朝來秋氣清佇看飛鴻鵠

題蘆雁扇

雁下秋已晚江天風雨微寧為聚沙立不作傍雲飛
游西宮有感

種不如意悠々無復聽漫尋村路好似得片時醒
水隱城坳白山來樹杪青晚田收襍襖殘日度苓箬
興入山陰道詩如歷下亭荒原子胥廟千載想像型
送一書記杲公作天寧化士

田家得米輸官倉一粒不得囊中藏天寧化士去如
兩此亦未易能低昂因官乞取民始病况復妄邀檀
越敬縱令不得半錢歸堂中聖僧應自知

京城圍閉之初天氣晴和軍士乘城不以為

難也因成四韻

賊馬侵城急官軍報捷頻民心皆欲闢天意已如春
魏闕方佳氣王畿且戰塵不妨來往路經月絕人行

守城士

北風且莫雪一雪三日寒不念守城士歲晚衣裳單
衣單未為苦隔壕聞戰鼓殺賊須長槍防城要強弩
砲來大如席城頭且撐住豈不知愛身一作傾心報
明主報主此其時一死吾亦宜未敢望爵賞且一作
今無事歸寄語守城士此言君所知

聞軍士求戰甚力作詩勉之

今春賊來時軍士怖而走今冬賊來時決拾射一作搃
兩肘憤然思出關不但要死守仰懷吾君仁愈覺戎
虜醜欲以占天心於焉卜長乂暫勞何足道富貴要
力取行看斬賊頭金印大如斗

丁未二月上旬

丞相憂宗及編氓恐禍延乾坤正翻覆河洛倍腥羶
報主悲無術傷時祇自鄰遙知漢社稷別有中興年

又

厄運雖云極郡公莫自疑民心空有望天道本無知
野帳留黃屋青城插皂旗燕雲舊耆老寧識漢官儀

又

羽檄從天下於今乂未回如何半年內不見一人來
周室仍遭變宣王且遇災猶存九廟在咫尺得祈哀

又

主辱臣當死時危命亦輕誰吞豫讓炭肯結仲由纓
洒血瞻行殿傷心望虜營尚留儀衛否早晚復神京
兵亂寓小巷中作

城北殺人叢徹天城南放火夜燒船江河夢斷不得
往問君此住何因寅一作緣竄身窮巷米如玉翁弄濕
薪媪爨粥明日開門雪到簷隔墻又聽隣家哭

圍城中故人多避寇在隣巷者雪晴往訪問
之坐語既久意亦暫適也

雪泥春既融曉日初破霧出門尋故人來往不數步
共談江南勝閉眼想去路松風被茅屋稻壠立白鷺
行看賊圍解春水即可渡先當上鍾山次第入廬阜
生平泉石念久受塵土泥况今九死餘轉覺處事悞
豫懷岩壑裏所至陪杖履可行君莫辭行李我已具

城中紀事

生平足艱窘可嘆不可言兩遭重城閉再因群盜奔
今茲所值遇我豈不與聞脫身保兒女恐辜明主恩

傍惶不忍去敢計生理存昨者城破日賊燒東郭門
中夜半天赤所憂驚至尊是日雪正作疾風飄大雲
十室九經盜巨家多見焚至今馳道中但行胡馬群
翠華久不返魏闕連妖氛都人向天泣欲語殺復吞
我病未即死爾來春既分剝床供晨炊两眼煙已昏
豈無好少年可與共殊勲志士或不耻有身期報君
塞水湏塞源伐木湏伐根子莫笑短拙荆蠻生伍員

讀易

江北江南公不歸人言公懶笑公痴閉門端坐讀周
易直過新春圍閉時

無題

胡虜安知鼎重輕禍胎元是漢公卿襄陽耆舊惟龐
老受禪碑中無姓名作禍胎繼

懷京師

北風作霜秋已寒長江浪生船去難客愁不斷若江
水朝思暮思在長安長安城外高十丈此地豈容胡
馬傍親見去年城破時至今鐵馬黃河上小臣位下
才則拙有謀未獻空惆悵漢家宗廟有神靈但語胡
兒莫狂蕩

讀司馬公集解太玄

京城半年圍道路三月病輕舟過江來所向復未定
客房夜涼冷氣體六粗勝月穿窻罅白風入洞葉勁
掩燈讀太玄愛此頃刻靜物數極三甲此理本天命
首贊則分行故來及世應古歷漢則亡易寔更三聖
哀哉揚子雲上與數子競雖云耗心力固自有捷徑
後來司馬公獨斂衆說盛錙銖判訛謬一宗蒙是正
讀玄則知易此寔公所證如何少年子便欲獻譏評
我老未知學讀此知不稱掩卷坐搔首一洗肝肺淨
明朝尋故人此語殊未竟

黃池西阻風

烏雲啣日不出驟雨飄風吼三日扁舟寸步不得
行坐嘆輕鷗如箭疾我行去家秋復冬故園回思春
夢中客愁茫若江水生計渺隨征鴻三年京城
共憔悴一杯此地難從容長溪卷浪雲花碎遠山橫
空眉黛濃故人別我上江去亦有書來喚同住破屋
數間君有餘太倉五升我已具嚴霜未放鷹隼擊盤
渦恐致蛟龍怒片帆欲掛任篙師君但徐行莫深懼

景德北窓

雲橫樹陰濃雨漲溪水白故人喚我去已度蒸暑厄
北窓非不佳尚苦眼界窄小樓陰床後自與塵霧隔
更憐昭亭山相向有佳色君能具鷄黍略不厭須索
我能知子窮子亦能愛客人生要如是一舉乃諷百
我病思遠引未塞交友責便當約諸公歸耕作長策
囊無一錢羸歲晚會有獲

昭亭廣教寺

故人喚我去一作出久雨值新晴草暗鼯鼠出山深鴨
鳩鳴齋厨半盂粥草具一杯羹尚肯頻來否門前春
筍生

昨日之熱一首贈趙彥強

昨日之熱未為熱涼風頗隨團扇發今日之熱不可

東坡先生詩集
言西山火炎塵障天高樓堅坐若燔炙常恐秋到無
寅緣與君相從今幾日欲度一日如長年憶昔京城
值秋雨人家邂逅得細語不愁歸舍少薪米具喜尊
前好賓主去年君自雲中歸隔巷尋君相勞苦是時
強虜在城下耳猶厭聽賊營鼓豈知喪亂到南城同
向宣城過殘暑晚來一雨天遂涼便思約君來對床
二前適有新酒熟君醉可舞吾能狂醉中談天亦未
妨回船吳君中勿忙

又贈

日二住疊嶂君能同此遊黑雲纔映日白雨忽穿樓

盜賊何時定溪山且自幽炎蒸不須歇俄頃是新秋

題涇縣水西

江東往已厭又却復一作過江西急雨投涇縣窮秋渡

賞溪稻田猶少水山路已多泥珍重高僧意求詩索

自題

宿秋霜閣後方丈

秋霜閣後山屈蟠一作盤行人衝泥腳未乾正是水西

佳絕處不辭風雨夜深寒

水西與李彥恢相從余將取旌德趨徽州彥
恢先歸旌德相候彭元任亦自太平縣來

相送遇于三溪驛遂同過旌德道中呈二子

水溪投宿近秋霜起聽晨鐘厭促一作束裝尚惜故人
輕作別亂山深處過重陽

又

村場路僻多無酒野菊寒深亦未花底事中原歸不
得又扶衰病過天涯

又

白頭懶入少年場二老追隨却味長預喜尊前聽清
話夜窓相對一爐香

休寧縣與汪致道諸公別後晚宿黟縣界魚

亭驛

竹密如雲不見天好山無數簇溪田祇因黟縣溪山
勝盡在魚亭驛舍前

又

故人相繼別休寧山路籃輿睡復醒所恨溪山正佳
處不能同我到魚亭

寄宣城故舊

宣城經歲無它事尚喜交遊不棄遺疊嶂樓頭納涼
處宛陵堂下探梅時君今尚要一囊粟我去亦無三

徑資歸卧雲山更深處因書頻報故人知

初門道中

去程歸雁兩匆匆行致荒山儘上頭試問中原何處
是只言東些是宣州

又

風落千山雨夜鳴時因歸夢識宣城欲知溪路行多
少已過徽州第五程

又

宣城人物未全衰四士風流世不_{一作}知別後略無
佳語寄道中纔有數篇詩

又

詹郎逸氣今誰似李令清言久不聞獨立共傳摩詰
後隱居還見伯仁孫

桂林別珂首座

故人相望馬牛風世事波濤滉漾中灘水東邊兩年
住往還纔有一珂公

又

北歸我已辦行纏久約相從却未然何處雲山堪著
子亂松回首嶺南天

答趙祖文陳夢授

嶺海畏深入江湖成遠遊猶懷不活怖少為故人留
苦乏瓊瑤報虛蒙札翰投因來問消息不必計沉浮
親朋雖近懶追尋湖嶺歸來病至今寄語洪州趙從
事忍令無酒過冬深

寄趙十一弟

東萊先生詩集卷十一

東萊先生詩集卷第十二

呂本中居仁

浮梁道中見小松數寸者極多然皆與蓬蒿
雜出不能即長也余傷之作詩寄范四弟
青松數寸根意出千丈外如何蓬蒿底此志久未遂
朝為牛羊踐莫受塵土翳雖云歲寒姿當此亦憔悴
今年雖小出尚與凡草類會須扶其根與作棟梁計
大廈千萬間匠石所睥睨世或未盡知斲勿傷汝志
自祁門至進賢路中懷舊

雨歇路踰滑山空鳥不飛却思無事日騎馬踏泥歸

又

汴水夾榆柳今留胡馬蹤如何進賢路只是見青松
離洪州渡西江至翠微寺紫清宮

平明渡西江西山正崔嵬中流欲浪作細雨隨風回
促權赴前浦頗為風雨摧寒沙引細路人家山半隈
密雨蔭修竹又早無莓苔晚入翠微寺諸峯環抱來
其西洪崖居百代所仰懷何年蛟龍怒更擊深山開
懸瀑瀉洪井噴噫藏風雷客行少休息暫此得徘徊
城市二三老咫尺不得陪豈無凌風翰邀致山中臺
澗水清且寒可以當餘杯獨來不敢久恐為神物猜
宿翠微寺

西山今夜雨不為故人留泥滑漚行李風殺欲送作
送秋中原且多事吾黨敢無憂明日經由地江南更
幾州

發翠微寺

古殿突兀風有殺粥魚欲打鷄三鳴披衣起坐問行
李僕夫屢報天陰晴昨日路長頻雨阻今日東風得
無苦杉松連山寒欲動橘柚隔籬香半吐却憶京城
無事時人家打酒夜深歸醉裏不知妻兒罵醒後肯
顧兒啼飢如今流落長江上所至盜賊猶旌旗已憐
異縣風俗僻况復中原消息稀

送宋仲安往虔州

已流之水不可以復回已往之日不可以復來惟有
野外籬邊之黃菊年々歲々見開花君如此菊不我
厭處々相逢不我同酒杯三年喪亂那可說君頭已
白我齒缺高才抑塞久未用坐守松檜凌霜雪君今
又作章貢游我猶少忍住筠州破屋不憂遭鬼瞰端
坐或恐貽一作神羞求田問舍古所嘆敢有遠去惟
身謀為約嶺南三數子明年乘興欲却一作東流

與仲安別後奉寄

出門送君時一步再徘徊雖云非遠別念與始謀乖

欲求連牆居故作千里來君今不我待欲跨洪溝回
我獨滯一方後會良未諧冬初風浪息蛟龍深蟄雷
其如中原盜所至尚揚埃子行莫夷猶恐致狼虎猜
胡人更遠適畏死投煙霾皇天久助順似不及吾儕
獨以智力免寧有此理哉因書寄苦語亦以謝不才
新春好天色指望妖氛開即當候歸艎取酒尋尊壘
欣然得一咲便足禳千災豫章百里遠可以慰客懷
須君起我病同上徐孺臺

題筠州僧房

客來無語坐禪房共賞西窓一榻涼山路雨餘新筍

出江城春色雜花香厨烟已逐鐘磬遠樹色初隨塔影長敢道閑居便安穩今年更欲下湖湘

離筠州

舊日閑居日無悰已倦遊如今避地走不復為山留
淮甸初經夏江西復渡秋今朝小亭望東北是筠州

題園悟與悰兄法語

果公昔踏胡馬塵城中草木凍不春胡兒却立不敢
問其誰從之悰上人袖手歸來兩無語如今且向江
南住雲居老人費精神送向高安灘頭去

建城道中

建城南路入袁州怪石縱橫水亂流盡日衣冠在圖
畫百年心跡付林丘中原未作重歸計胡馬能令此
地憂浪跡江湖亦吾分運籌帷幄有留侯

行至醴陵寄故人

淺溪砂磧寒月白樹影踈我行天一角所至尚躊躇
偶逢勝絕地不異嵩穎居臨流遂忘歸默坐數游魚
定知胡馬關江縣已丘墟故人亦未來一旬三寄書
不必問淺深但當膏子車新霜隨北風慘澹度重湖
相尋近嶺御勿厭長途

將至南嶽先寄演公禪師善公華嚴

胡馬揚塵烽燧作我行乃在天一角江西跣足過湖
南本赴郴陽故人約中途群盜又烽起所至往：為
囊橐遲回改路心自咲隱忍畏事人所薄不因此去
渡湘水更欲何時到南嶽山中况有二老人萬里同
來且安樂遙瞻見我應大笑白鬚黑面都如昨平生
故舊幾人在不早從公老丘壑自經喪亂可過從每
一思之懷抱惡請公更說因地初一解人間因慧縛

避寇南行

何處田園不是家儘扶衰病過天涯山村酒熟人：
醉客路春濃處：花敢道嶺南無戎馬側聞江左尚

沙囊空甌倒君休咲亦有新詩伴齒牙

貞女峽

欲上貞女峽江險未敢行豈是畏江險愧此貞女名
時經喪亂後世不聞堅貞烈士久喪節丈夫多敗盟
寧聞閨房秀感義不偷生窮荒禮法在尚在留佳教
時事有通塞江流無濁清欲行勿憚險為君先濯纓

山水圖

君家茅屋低蓬蒿客來頗厭蛙蚓號何得有此山突
兀氣壓太華凌嵩高坐看遠澗愛懸瀑似聽蛙步鳴
秋濤槎牙老樹半枯死上倚絕壁綠飛猱我行日畏

盜賊逼敢厭瘴癘同腥臊偶逢坐穩懶歸去豁達眼界無纖毫嶺南山水固多異恨無中州清淑氣對君圖障心恍然便如似一作太華嵩前高但君對此能高眠當有好句令君傳

連州陽山歸路

蒼黃避地出連州邃谷深岩懶轉頭歸路始知山水好少留村驛當閑遊

又

稍離烟瘴近湘潭疾病衰頹已不堪兒女不知來避地強言風物勝江南

又

嶺外從來不識春青梅年後已嘗新深山忽有殘花在知與清明待北人

陽山道中遇大風雨暴寒有感

嶺南二月春已盡百花委棄隨風吹山前山後綠陰滿已過中原初夏時不知何氣忽乖沴一作風雨夜作雷乘之鞭笞宇宙蔽日月萬象倒錯藏光輝岩傾澗絕水府現捕搏虎豹擒蛟螭百圍老樹不須說忍凍欲壓摧其枝崢嶸屋瓦走飛電如戟初合麾旌旗我行避地更值此閉目但聽兒啼飢僕夫噤死者數

輦牛馬俱不存毛皮長途三日斷還往况有烏鵲凌
雲飛只今胡塵暗江路盜賊往、乘餘威良民雖在
困須索西海萬里皆瘡痍天公忍不一顧此反更震
動窮荒為此方亦是神所主吾欲告訴心先疑明朝
風定寒亦解收召魂鬼尋歸期澗毛自可薦筐筥試
出苦語令神知

答朱成伯見贈

三年轉東南足跡不得息新霜未壓瘴已畏賊馬迫
逼一作蒼黃度嶺去山路楓葉赤慨然念生平謬自有
欣戚交游半鬼錄在者費相憶朱卿早聞道一如見
舊識新詩入要妙如射已破的我行囊貯空所至但
四壁豈知投異縣忽枉和氏璧斯文得未喪豈不係
人力出門仰高山此道如矢直

又

我適蒼梧野君來洞庭岸相逢迫逼一作盜賊一咲未
得款欣然望眉宇於我意自滿天寒道路長歲晚日
晷短僧房肯再來晴窓自妍暖

又

入林恐不遠入山恐不深城市有深遠不必在山林
隋珠不自寶豈在須淵沉斷弦得遺譜千載有知音

又

昔在中朝時每從賢俊遊酒酣握手歡預懷今日憂
兩經嶠嶠春三度江湖秋朱卿抱竒節好語忽見收
我無濟世策君有活國謀相尋不相咲夜光猶暗投
道喪師友絕寧有民不偷風波極浩渺欲濟能無舟

連州行衙水閣望溪西諸山

嶠南氣常昏終日如霧隔我來已經時初不辨山色
紛：翳犯眼默：悸動魄今晨忽晴快如語見肝膈
群峰插天青野水恣意白深窺木杪靜細數鳥道窄
天心豈無意直欲慰北客纏經盜賊擾更脫瘴癘厄

湖湘雖未定勢已初夏迫頗聞胡虜遠不復更追索
我歸當何時俗事累千百便擬衡山前今年飽新麥
憂慮則未已四海方逼仄群公獻納際或肯任此責
先當肅區夏次用及蠻陌豈容胡虜暴歲山有大獲
天雖未悔禍世豈無良策生一作人苟未盡狐兔當
有宅

贈歐陽處士

愛君年少便知足今君雖老更轉一作無欲閉門不出
動經時保此無窮清淨福黃衣弟子雜僧徒共守荒
郊數椽屋門前山水各有態君但踈籬對修竹直如

季路恥有聞清似之推不言祿坐看世事雲變化一
任兒曹手翻覆上皇龍飛三十春臨軒亦嘗思異人
詔書屢下廣搜尋當時幾人能識真君時聲名動天
子高卧不起空逡巡漫收符籙養丹火一旦四海生
風塵我來見君解嶺下識君無營真靜者殷勤愛我
莫遽行尚肯相從結茅舍時當喪亂足淹留豺狼恣
橫空山夜宅年有意過匡廬廬一作廬山更許淵明入蓮社
嶺外懷宣城舊遊

中原未敢說歸期却憶宣城近別離疊嶂雨來如畫
裡敬亭秋入勝花時每憎卑濕尤多病苦愛風光屢

有詩今日衰頽那可說鬢鬚經瘴總成絲

余避地踰嶺寄書宜章孫氏賊去則盡失之

感歎有作

賊馬縱橫未說歸草間梁上借餘威布帆此去應無
恙銀盃從來小鮮飛世事只堪開口咲主人空有食
言肥自慚學道工夫少坐覺文書到眼稀

過嶺將至江華先寄朱成伯

自怪匆々來徃忙又携兒女過湖湘敢言此地多安
穩且道新年離瘴鄉

又

東坡先生詩集
嶺下微陰已自寒早行山路覺衣單故人見我應驚
咲疾病衰頽却據鞍

端午日北還至斛嶺寄連州諸公

嶺上逢端午隨家更北征隔村聞賊鬪通夕畏蛇行
厭病初辭瘴衡泥却勝晴猶憐昌歆酒不與故人傾
豆苗可瀹匏可羹僧厨半飯蒸香粳道人得此清淨
供下箸已勝肥羊烹平生為腹不為目偶逢一飽心
自足晚菘早韭舊所知五鼎百牢未為福

寺居夜起

山深夜無人竹密風露集長空新過雨尚覺星斗濕
避地走天涯如何免拘繫朝憂粟囊盡暮恐賊報急
荒城兵火後所至復來葺古寺半頽垣裊嘯鬼亦泣
感事念平生徘徊近塔立

寺居即事

瘴癘過庚伏庶幾其少瘳甘心忍殘暑指日是清秋
汴水他年別柳州此日留如何理歸夢只見嶺南州

又

因循過嶺表忽復到湖南氣力渾非舊情懷老不堪
無錢供痛飲因病癯清談尚有尋書僻窮搜未免貪

又

中原是何處敢道幾時回一夏無書讀經時畏賊來
老松猶偃蹇病鶴又推頹莫怪論兵少吾今心已灰

贈夏庭別兄弟

披沙揀金勤乃見讀書何止須百遍如君心期已不
凡况有長兵可鏖戰一寒濕薪薰病目君但讀書殺
徹屋僧房夜永燈火足更肯襍被來同宿

墨梅

嶺南十月春漸回妍暖先到前村梅問君何處識此
妙一枝冷艷隨霜開長江凜凜欲奔岫乃見好事移

墻隈初疑滲漉入瘴霧更欲寂莫埋烟煤微風不動
暗香遠淡月入戶空徘徊坐看粉黛化羶惡豈但桃
李成輿臺我行萬里厭窮獨疾病未已心先灰對此
不覺三嘆息恐是轉側同南來異鄉久處少意緒破
壁相對無根菱古來寒士每如此一世埋沒隨蒿菜
遁光藏德老不耀肯與世俗相追陪輪囷離奇一作落
多見用犧尊青黃木為一作災含毫吮墨去顏色况
自不必須穿栽歲窮路遠莫惆悵此去保無蜂蝶猜
賀州聞席大光陳去非諸公將至作詩迎之

韻有次

東萊先生詩集
五年避地走窮荒嶺海江湖半是鄉歡喜聞君俱趣
召衰頹如我合深藏曉寒已靜千山瘴宿霧先吞萬
瓦霜日：江頭望行李幾回驅馬度浮梁

送周靈運入閩浙

青松著塵市不辭塵土侵忍耻半桃李不言歸故林
交游在賤貧始見平生心周侯客異縣屢蒙金玉音
殷勤不我厭自昔以至今使其少富貴未必能相尋
豈謂子誠然此風今則深子欲轉嶺海歲暮足愁陰
路經盜賊窟往：未就擒加鞭策駑馬欲行無滯淫
故人散天涯所在亦崎嶇相尋倘見及道我病難任

次韻錢遜叔見寄

異時文物漢庭臣公是中朝第一人忍使閑行犯山
瘴不令疾去掃胡塵情懷縱老原非病時運方隆只
暫屯願我衰頹已無用尚煩新語訪沉淪

贈宗真上人

到處相逢是偶然淞江湖嶺屢經年贈君頌子君休
笑我已新來不問禪

東萊先生詩集卷第十二

東萊先生詩集卷第十三

呂本中居仁

全州與解子申向恭相會

五年流落判西東尚喜交游一再逢但得低頭拜東
野不妨下卧見元龍中原極目山千疊往事傷心酒
一鍾如我支離又無用敢因窮約廢過從

一作費相從

初至桂州

連年走遐方所至若郵傳未論道艱阻先問米貴賤
賤勢來未已行役我已倦解鞍憇空館敢歎此異縣
清泉上短絁一洗塵垢面瘡癩非不深羨醞良可戀
又

胡沙又衝突賊馬亦馳驚我行不得息終歲在道路
敢言更多事尚恐與時忤低頭訪殊俗何處可放步
江流下滄海日慘蛟鱷怒出門尋故人風雨已斷渡
桂林解后拜見仲古龍圖吉父學士別後得
兩詩書懷奉寄

所至艱危裏如何更別離只看山似戟合鬢如絲
湯燮徒增疾文章不療飢端居溫餘論苦語自成詩
折老父高卧曾卿仍倦游全為萬里走肯避數年留
賊幟江湖晚嵐烟嶺嶠秋相逢得安穩乘興莫東流
比聞二公皆欲
為廣東之行

次韻吉父見寄新句

詞源久矣多岐路句法相傳共一家良賈深藏宜有
待大圭可寶在無瑕長江渺、看秋涯孤霧悠、伴
落霞盛欲寄書商摧此嶺南不見鴈行斜

桂州水西

隆、而雷風乘之斷霓落日江東西江頭古寺頗岑
寂僧簷正與南山齊我来端坐已寒暑終日看山默
無語盜賊連村那敢問藜苒充腸未為苦早禾已早
心所知正待山前一犁雨

斲橋 三月中作

橋斷客途少春深花已休閉門尤省事於世轉無求
來往只諸老相期非壯遊欲知身所住同寓嘗家洲
時獨范叔器李平裴
夢既數相過從也

贈嶺東陳秀才

風吹賀江浪如雪浮梁左右行人絕病夫坐穩懶出
行破屋只愁吹瓦裂東縣陳卿忽叩門笑語歡然相
暖熱怪我長貧走道路所至不安寧有說鄰州賊報
又警急欲泛扁舟窮百粵如君長材亦未用獨守區
區負竒節未能俯首効兒輩肯便出門探虎穴馬群
時致千里足烈士寧無一時僚我復何人敢言事一

世摧頽甘短拙幸君無事時一過喜聽高談健其決
瘡癘叅畏久留歲月崢嶸惜輕別

衡州逢解子中別後奉寄

我來筠水陽君亦發章貢相逢瀟門外及此兵未動
卧聞羽書馳起已行者衆匆、不及款尚辱苦語送
慨然念平生相從已如夢交游半生死所至多罅縫
我衰學不入一作君亦老未用孰知一世中有其九
鼎重子賤則君子閔子言必中師門未遽絕斯文寔
天奉別離又幾日坐想發孤諷衡州逼南嶽湘水寒
不凍頗傳江西擾盜賊已放縱往從田蘓游此樂不

得共

范縣丞惠雙鷄

羸病不能除肉味每逢齋鉢愧餘生
雙鷄未可為公饌留與山僧報五更

王撫幹失去毛裘

王郎隨身一駝裘偷兒遽作壑失舟
春初未免霜露迫逼一作歲晚可無遷徙憂
客房夜坐薪當燭不怕近江風裂屋馬平編戶更艱難
君行莫忘民號寒

四十二弟將還賓州相還夜話

兵戈久未歇所至轉搶攘萬里逢吾弟
三年走瘴鄉

過

春風入古寺夜雨暗浮梁尚肯留連否
僧廬可對床

呈折仲古

市酒酸甜久絕沽濕薪薰眼坐僧爐
尚憐諸老無機

幾一作事不待愁人折簡呼

又

龍閣老翁流落久如今辛苦去朝天
向來嶺海經行地分付蠻溪著釣舡

又

已無厚祿故人書尚有相尋長者車
所至紛然兵火裏不知從此更何如

又

疾病侵凌百不能只今全是任庵僧謝安肯為蒼生
起早與吾君了中興

次韻王撫幹見惠

新春忽·到庭除短褐經輕一作寒病却蘓漫以詩書
教兒子嬾將薪水倩童奴天涯每覺人情薄眼界何
知風景殊萬里相逢君莫歎好山無數簇城隅

次韻王漕見贈并寄曾吉父

前賢去則遠今代不無人小出已無敵深藏恐未仁
兩章知思苦一語見情親徑欲忘衰病知公筆有神

又

曾子住南國端居無所思逃禪不用酒投筆謾成詩
敏捷忘千慮縱橫又一奇於中有佳處莫待折肱醫

次韻折仲古見贈

未有絲毫補縣官幾年流轉但求安江湖自稱稽康
嬾故舊空嗟范叔寒顧我初無食肉相喜公復著侍
臣冠新詩不忘東山一作志敢作尋常禁近看

再用前韻奉和

自昔支離畏一作作官只今猶望一枝安飽知時態
病良已心喜故人盟未寒所至軍書銷日月幾回戎

馬汚衣冠公歸定有安邊策不學愚夫靜處看

夜坐有感

五更月落鷄未鳴小爐殘火猶晶熒道人強起理衰
疾不聞松聲聞雨聲跣趺坐穩百念去豈有宿夢今
神驚平生於世萬事嬾况復今茲飽憂患中原北望
四千里三年不見南飛鴈著身天涯未為遠所至風
沙莫深歎時寒但一作通僧房火日暖可一作赴鄰
家飯嶺南無瘴便可老江頭有酒猶堪喚嗟哉甯子
不自休辛苦飯牛過夜半

送密上人歸江西

輕舟君先行羸馬我已往湖山已在望南嶽行可仰
不憂盜賊繁漸喜草木長密也負奇氣少已離塵網
飽參諸方禪所至被稱賞獨留未後向未肯休吾黨
徑尋卓錫地更足以自養囊空脚頗健體儉心甚廣
喜談江西勝妙處猶一作指掌未見頻寄書悠然發
遐想

送常子正赴召

屬一作昔者閑居久今來促召頻但能消黨論便足掃
胡塵眾水全歸海殊塗必問津如何彼黠虜敢謂漠
世一作無人疾病老逾劇交親窮轉踈惟公不改舊怪

我未安居日月干戈裏江山瘴癘餘
回行見李白亦莫問何如

頌送山人遊南華

三浙三衢未說歸且從嶺路訪曾溪
盧公若問南來事但道江湖盡鼓鼙

山頌送譚師直歸湖南

人事日翻覆昔同今不然於心苟有用
與世自無緣剝結官田社飽叅雲蓋禪
已勝高鳥盡徒泛五湖船

送能化主還法輪

嶺外三年避賊忙法輪元不下禪床
君歸却說嶺南

事瘴暑作時君自涼

送夏少曾兄弟

處·人家避賊忙數因行李問舟航
江橫晚照鳧鷗亂春到空山草木香
我行有緣離嶺嶠君今決策下湖湘
定知此去漆貧病不及相從氣味長

本中將為江浙之行念當與夢賦遠別感歎
傷懷因成長韻奉呈

客行已無聊况此憂慮集頽然念遠役未見勇可習
虛庭覺氣潤遠視螢火濕故人不我厭踏雨相勞揖
朝餐共飢飽夜語仝坐立問我去此邦何用如此急

東坡先生詩集
干戈與瘴癘未見可出入何殊知二五而不知有十
俛首謝勤意此非愚所及天涯重離別所至方業叟
感懷平生奮忍効兒女泣胡沙救中原道路滿荆棘
世事古則然臨分莫於邑

贈日者張直夫

因循避世不求名潦倒江湖過一生賈誼定能尋李
主子雲先已識君平獨行市肆口無語嬾踏權門身
自輕看甌生塵只堅坐世間似君寧有不平鳴

永州西亭

舊聞西亭勝獨盛湘湖間山秀水亦好千里在憑欄
今來乃不然眼境故未寬環城但濁水滿目惟荒山
如何柳司馬肯為此解顏始之憂慮久方覺所遇安
我從避地來山水亦一作飮觀初不厭嶺嶠况敢作
復嫌荆蠻徘徊念昔人亦作故意看所慙二三子來
不倦躋攀開軒納微涼共享一日閑說詩到雅頌論
文叅詰盤快若箭破的圓於珠在盤此樂固可樂以
盟安得寒天暑畏道路時危安一作阻難相逢得少
款莫問何時還何須待杯酒始盡平生歡

語溪

吾月行人汗如雨意緒昏、雜塵土語溪一見中興

碑便有清風濯煩暑中興之業誠艱難敢作漢武周
宣看紛然大曆上元間文恬武嬉主則孱但知追咎
一祿山袖手不作如旁觀天亦未使庸夫干故生李
郭在人間一時節士張許顏其誰不知唐已安道州
落筆風寒魯公大書鎮百蠻訶叱水怪推神姦有臣
若此世所歎而不能使君心還我來轉嶺逾千盤對
此凜然清肺肝想見群小遭譏彈爾曹何心猶誕謾
至今怒髮常衡冠

送元上人歸禾山

長囂而寂方作而息如射破的初不以力子居深山
又處絕頂避囂不作二事俱屏往來臨川道里且千
一見我喜如舊交然我欲屬子重於發言子請則堅
之子之賢遍尋諸方不主先入唯是之作何拘何執
惟昔善財我曹之師其心廣大誰能問之山高海深
德則不孤不深不高培塿潢汚奚必深山惟靜之守
求寂念息以閱永久

贈一上人

偶從嶺嶠轉江東得向踈山見一公所至疇一作共游
常草爾來相遇更匆晁郎埋骨虛無裏壁老收
聲一作蒼莽莽一作蒼中二十餘年往還事半隨秋鴈落

寒空

贈珪公杲公

北歸任江西塵事日窘東兩公時踵門高誼已絕俗
空房擁殘火更許相就宿不嫌寒無檀肯厭飯脫粟

又

杲公玉壺水所至自清淨珪公出林鶴肯與雞鶩競
吾窮得兩公頗覺意氣盛未能出艱危猶足起衰病

又

杲固昔所熟珪尔舊聞名江西一聚首遂覺南去程
掃除文字習追尋香火盟期君向此道隱若一長城

又

堂頭老居士我識蓋自早聲名從少年閉戶今却掃
公能為少留尚可慰枯槁欲知主人賢但看此二老
次韻錢遜叔清江圖後

公但一室堅坐我方萬里生還共作十年清夢全尋
五嶺名山

又

作清江三兩曲勝大厦千萬間若保此中安坐不必
中原遽還

次韻錢遜叔獨鶴圖

東萊先生詩集
長頸竦身嬾不前此寧有望更騰騫懿公愛爾非無
意要壓曹人三百軒

又

粉墨半銷翎翅短正如衰髮不勝簪可憐少保功名
悞寫此凌雲意不堪

又

眼明見此出籠鶴似我北歸辭瘴嵐御勿莫一作低頭
待收養人間欣戚盡朝三

次韻錢遜叔畫圖

西風著人塵滿襟江山縱近難追尋當年寫此數幅

妙坐使几案頻登臨斷雲黯慘出古寺遠岸杳靄連
荒岑漢舟蕩漾江路晚烟雨濛籠山店陰知己落筆
一作筆下氣象古一任世間消息沈最憐霜幹倚長石不
待歲久成枯林知公此中興不淺此畫故能留意深
只今燕坐一室裏尚費後來長短吟詩成掩卷坐秋
晚一唱三歎求遺音

送一上人

我齒久已搖君髮日向白相逢不相笑共被老境迫
周旋三十年近多間隔伊昔無事時日夕望顏色
此道要琢磨苦語費思索不能如宿心每負朋友責

別我寧陵縣隨我昭德宅所期無二三可恨已千百
交游大半死况值兵火厄舉首望八荒無乃天地窄
涼風吹秋深江湖動行客誰能於此時際一作出語見
肝膈胡塵蔽中原盜賊暗阡陌公其無遽行待我有
良策

錢遜叔諸公賦石鼓文請同作

江頭羽書相續來城中草木凍不開腐儒坐視了無
策但守寒爐吹死灰我公送我石鼓文今我琢句要
春回簸蕩風雲走馬一作蛟蜃百虫久蟄聞驚雷錢公
自是力扛鼎持此浮游轉湖嶺漢碑秦篆已么麼况

復鍾王敢馳騁後來頗供兒女弄神物有知當遠屏
石鼓之文公所知正是周室中興時庶幾我皇亦如
此一掃狂虜隨風仄一作飛石鼓之文尚可讀小臣願
繼車攻詩

和邢子堅韻

萬里重歸舊秃翁笑談聊復與君仝鷓鴣所願一枝
足鼯鼠從來真一作五技窮短髮自梳渾欲白殘爐因
客尚能紅正須混迹師元亮未忍低頭學敬通

東萊先生詩集卷第十三



